

History of Bodo Literature Novel

Karen Basumatary
Bengtol College, Bengtol

बर' थुनलायखौ संदाननो थाडोब्ला जों नुनो मोनोदि बर' सल'मानि जोनोमा गोदान मुगानि माखासे लिरगिरिफोरनि रेबगनावसो जायो। गोजाम मुगायाव बर' सुंद' सल'खौ जोनोम जानाय नुयोब्लाबो नाथाय गोजाम मुगायाव बर' सल'मानि जोनोमखौ रावनिबो रेबगननिफ्राय नुनो मोननाय जाया। 1940 माइथायाव प्रमद चन्द्र ब्रह्मनि सुजुनाय हाथखिं हाला लाइसियाव नुजानाय इसान मोसाहारिनि आबारि सुंद' सल'नि जोनोम जानायनि 22 बोसोर उनावसो बर' सल'मानि जोनोम। बर' थुनलायाव चित्तरन्जन मोसाहारिनि राफोद आखायजों सोरजिजानाय इं 1962 मायथायाव "जुजायनि अर" गिबिसिन बर' सल'माया जोनोम मोनो। बिथां चित्तरन्जन मोसाहारियानो बर' थुनलायनि बाख्रियाव बर' सल'मानि जोनोम गायसनगिरि आरो बेजों लोगोसे बर' सल'मा जौगाखांहोनायाव बयनिख्रुइबो बांसिन सल'मा लिरनानै गोबांधार बिहोमा होलांदों आरो बिनि उन-उन माखासे गागि लिरगिरिफोराबो सल'मा लिरनानै गोबां भान्दारि होलांदों।

गिबि सल'मा जोनोम जानायनि उननिफ्राय 1990 मायथाइसिम गोबांधाय नडाब्लाबो गुबुन गुबुन सल'मा लिरगिरिफोरनि राफोद सानस्त्रिजों सोरजिजानाय बर' सल'मा जोनोम जानायखौ जों नुनो मोनो। गिबि सल'मा महरै चित्तरन्जन मोसाहारियानि 1962 मायथायाव ओंखारनाय "जुजायनि अर" सल'माया गांसे जाफुंसार बर' सल'मा। बिथानि बे सल'मानि गेजेरजों अजय आरो अलखानि थार मोजां मोनलायनायनि दुखु-दाहा, हांमा-हांसाखौ बिथा खालामनानै लिरनायजों लोगोसे बर' समाजनि समाजारि सावगारिखौबो बेरखां होनाय नुनो मोनो। "जुजायनि अर" सल'मानि उनावनो बिथानिनो "गोरोन्थिनि उनाव" समाजारि बर' सल'माया 1970 मायथायाव नुजायो। इं 1972 मायथायाव सानैसो राफोद आखायनि रेबगनाव गांनैसो सल'माया जोनोम मोनो। जेरैहाय- रामचन्द्र बसुमतारीनि "खाफालनि बोसोन",

चित्तरन्जन मोसाहारिनि "बिखाया गावो खुगाया गेवा" बायदि। बेबायदिनो राजेन्द्र नाथ ब्रह्मनि "फैमाल" (1974), मनरन्जन लाहारिनि गिबि सल'मा सोरजि "खारलुं" (1976), कामाख्या चरण नार्जरीनि "हांमा" (1976) बायदि बायदि बर' सल'माफोरा सेबखांजायो। मनरन्जन लाहारिनि गिबि सोरजि "खारलुं" सल'मानि गेजेरजों गाहाय आखु गहेलनि गेजेरजों बर'फोरनि गोसो थि नडै एबा गोसो दिदोमथि नडै खारलुं आखुखौनो फोरमायदों बेजों लोगोसे माखासे बर' समाजनि गोथां समाजारि सावगारिखौबो रोखा रोखायै बेरखांहोदों।

इं 1977 माइथायाव नबिन अवारिनि "बैसोनि देंखो" आरो इं 1978 माइथायाव बिरेस्वर बसुमतारीनि "जौमोननि बर्षा" बायदि जाफुंसार बर'सल'माफोरा ओंखारो। बेबायदिनो इं 1980 माइथायाव माखासे लिरगिरिफोरनि राफोद सानस्त्रिजों सोरजिजानाय गांब्रैसो सल'मा बिजाबफोरा ओंखारो। जेरै- धरनिधर अवारिनि "मैहुर" नन्देस्वर दैमारिनि "मनजुबाला देबी" बुदुधदेब बसुमतारिनि "दैथुन" परमेस्वर ब्रह्मनि "पियारि" समजित कुमार ब्रह्मनि "मालति" बायदि। धरनिधर अवारिनि मैहुर सल'मानि गेजेरजों सल'मागिरि बिथाडा बर'फोरा मिथिंगानि सायाव सोनारनानै हाग्रा सेर सेर थानानै माबादि संसार जानो गोनां जायो आरो अरनबारिनि जिब जुनारफोरखौ माबायदियै मैहुर खालामनानै गावसोरनि आदारखौ बुथुमो बेफोरखौनो फोरमायदों। लोगोसे बेफोर आदारफोरखौ बुथुमनायाव अरननि जिब जुनार आरो सरकारनि मानसिफोरजों माबादि मोगा मोगि जानो गोनां जायो बेफोर बाथ्राफोरखौनो रोखायै फोरमायदों। बेबायदिनो 1981 माइथायाव जारा फाग्लानि "बिषनि लैथो", हांमा ब्रह्मनि "आनरनि जिउ दिडा", चित्तरन्जन मोसाहारिनि "गार्लस हस्टेल (Vol-I)" बायदि बर' सल'माफोरा जोनोम मोनो। चित्तरन्जन मोसाहारिनि "गार्लस हस्टेल (Vol- II)" (1982), कान्तेस्वर ब्रह्मनि "फागुनि" (1982) रुधिर कुमार ब्रह्मनि "खाफाल" (1983), नबिन मल्ल बर'नि "देबजित, मलिना आरो आं" (1983), चित्तरन्जन मोसाहारिनि "फुलमथि" (1983), आरो 1984 माइथायाव हरेस्वर बसुमतारिनि "थैजों बुंफबनाय उदां बोथोर", समजित कुमार ब्रह्मनि "हिनजाव गोदान", कान्तेस्वर ब्रह्मनि "ओरैनो जेबोला", बायदि बर' सल'माफोरा सेबखांजायो।

इं 1985 माइथायाव मनरन्जन लाहारि बिथांनि नैथि सोरजि "हायना मुलि" सल'मा बिजाबा ओंखारो आरो बे एखे मायथायावनो हाबिला बसुमतारिनि "फाखन

फैसालि", जि. आर. बसुमतारिनि "गोरोन्धिया आदानि नडा", बिष्णुज्यति कसारिनि "बांग्रि" बायदि बर' सल'माफोराबो ओंखारो। मनरन्जन लाहारि बिथानि "हायना मुलि" सल'मानि गेजेरजों बर' समाजनि खोमसि फोथायनायखौ उन नु आव लानानै मोजां मोनहोनो थाखाय हायना मुलि बानायनायखौ दिन्धिनाय जादों। राग'बायदि सासे दाहोनाया माहाजोननि फिसाजो मानासिखौ मोननो थाखाय हायना मुलि होनानै बिसोरनि उन संसारा माबादि गिलु-फालु जाहैनांदोंमोन बेखौनो फोरमायदों सल'मागिरि बिथाडा।

इं 1986 माइथायाव निलकमल ब्रह्मनि "मावरिया", चित्तरन्जन मोसाहारिनि "बिलोगो" बायदि सल'माफोरा ओंखारो। बेबायदिनो इं 1987 माइथायाव फुंरजेनि "इन्दुमालतिनि मोदै", चित्तरन्जन मोसाहारिनि "उनदाहा" आरो "दाउखानि बाहा" सल'माफोरा ओंखारो। इं 1988 मायथायाव पानिराम दैमारिनि "बोलो ना गियान", दैमालु बर' नार्जारिनि "मनजुलानि सिददावनाय थै", हरेन्द्र दैमारिनि "हालालि रायजोनि सिलिंखार" सल'माफोरा सेबखांजायो।

इं 1990 माइथायाव सानै सल'मागिरिफोरनि रेबगनाव गांनै बर' सल'मा ओंखारनायखौ नूनो मोनो। जेरैहाय- अरन राजा बिथानि "हरै मारुयाव" आरो दैसा दैमारिनि "मोनसे महर मोननै सिनायथि"। "हरै मारुयाव" सल'माया अरन राजा बिथानि गिबिसिन सोरजि। बिथानि सल'मायाव मोकथां जिउनि गाब गैयाब्लाबो बर' माहारियाव जाफ्लेबाय थानाय मुगैलायनाय , हिंसा-हिंसि, मोजां मोनलायनाय, बोराबलाइनाय आरो फाउफान्दायलायनाय बेफोर सुबुडारि जेंना जेथोफोरखौनो फोरमायदों। बेबायदिनो दैसा दैमारिनि "मोनसे महर मोननै सिनायथि" सल'मानि गेजेरजोंबो दैमु आरो खुंख्रामोननि मोजां मोनलायनायखौ मिरु खालामनानै बर' माहारियारि सावगारिखौनो एरखांदों।

इं 1991 माइथायाव सानैसो सल'मागिरिफोरनि रेबगननिफ्राय गांनैसो बर' सल'मा सोरजिजानायखौ नूनो मोनो। जेरैहाय- दैमालु बर' नार्जारीनि "अल'खद", अरन राजानि "गोसोम फैसालि", उत्तम चन्द्र मोसाहारिनि "थरथिंसे थैनि बेसेन" बायदि सल'माफोरा ओंखारो। बिनि उन उन इं 1992 मायथायाव ननि गपाल ब्रह्मनि "कल्यानि नों आंनि", तिरेन बर'नि "बिग्राय आरो दैस्राय", जोंसार बड'सानि "जारिमिननि फैसालि" बायदि

जाफुंसार सल'माफोरा ओंखारो। इं 1993 माइथायाव चित्तरनजन मोसाहारिनि "खिथिर", अजित कुमार बरगयारिनि "खरसानि मान्दालि", प्रमद चन्द्र बसुमतारिनि "गोरोन्धिनि लामायाव" बायदि बर' सल'माफोरा सेबखांजायो।